

AntropoLad va inant

La Scola de Fascia, con i Atenei de la Region e l'Istitut Ladin, é dò a reformulèr i corsc de auta formazion su lengaz e cultura ladina, ouc soraldut ai insegnanc ma averc ence a duc i interessé

Cultura - L'é dò a ruèr a piz l'prim bienie de AntropoLad, l'cors de auta formazion che, dò n muie de egn de tentatives l'é stat metù a jir te Fascia del 2017 de gra a na Convenzion, arjonta travers l'urier de sinergia anter la Scola Ladina de Fascia, l'Istitut Cultural Ladin, l'Comun general de Fascia e la Provincia de Trent, ensema a la Universitàs de Busan e de Trent.

Da egn la comunanza ladina de Fascia spetèa la costituzion de n sistem permanent per ge permetèr a chi che jà insegna, ma ence ai studenc universitàres che sarà i dozenc del davegnir, de tor sù la competenzes linguistiches e culturèles che serf per insegnèr al miec te na scola plurilingue desche chela de noscia val.

L'é stac passa 60 i dozenc, studenc universitàres o operadores culturai che à tout pèrt al cors de studies che l'é tacà ite al scomenz de l'an de scola 2017/18 te la Scola ladina e l'é jir inant ence te chest an de scola, con lezions de vender e de sabeda: n numer sorafora la spetadives.

N muie l'é stat i insegnamenc te chisc 2 egn. Chest an l'program à metù dant linguistica ladina, lessicologia e toponomastica per ladin con l'professor Paul Videsott, che l'é ence Degan de la Facoltà de Scienze de la Formazion de l'Università de Busan e diretor del Cors AntropoLad; lettradura e analisa di tesé con l'diretor de l'Istitut Cultural Ladin Fabio Chiocchetti, che per chesta ocasion l'à enjgnà e dat fora con l'ICL l'liber "Scritores ladins", na opera de 600 pates su la storia de la lettradura de Fascia, de gran emportanza per la



I studenc del prim cors de AntropoLad endèna na lezion.

trasmission de la cultura de Fascia a la generazions più joenes; e amò mudamenc sozièi, mendranzes e identità con Ester Gallo de l'Università de Trent; etnografia e antropologia visuèla con l'antropologh Cesare Poppi; didatica del ladin e glotodidatica con Ruth Videsott de l'Università de Busan. Via per l'an passà i studenc aea fat lezions ence de lineamenc de linguistica romanza, ortografia e gramatica del ladin, carateres generèi de l'antropologia alpina, aspec de la cultura alpina e itineraries etnografics e amò soziolinguistica di lengac de mendranza.

Te l'ejam finèl de chest prim cors i studenc à realisà ence n muie de "tesine", tropes dassen de gran enteress, che met al luster o va a fon sun aspec o elemenc particolèr del lengaz o de la lettradura.

Endèna l'é stat tout dant e analisà endrez e resultat, e valutà i besegnes de mudamenc con chela de jir inant al miec con l'uton che vegn per arseguèr sul teritorie na auta formazion permanenta sui temes de lengaz, lettradura e èrt, storia e

antropologia ladina, per renforzèr la competenzes profesionèles di dozenc ma ence per sporjer ocasion de crescimonìa culturèla de valuta te val, tant che na piccola Università.

L'obietif l'é che AntropoLad posse ge permetèr ai insegnanc de otegnir l'abilitazion. Per chest la Scola e i organisadores é dò a studièr fora n percors più articolà, olache i dozenc e duc chi che é interessé no i cogne più tor pèrt a amancol 9 sun 12 corsc, descheche l'era stat te chesta prima butèda, ma i posse cerner ence demò vèlch un di corsc che vegnarà perferii col secondo bienie de AntropoLad, concostan credic che podarà joèr per l'abilitazion.

Per entener colun che podessa esser l'enteress di dozenc e de la jent de Fascia e tor sù opinions e osservazions, tant da chi che à jà tout pèrt ai corsc che da chi che à a cher la cultura ladina, l'é stat endrezà n costionèr che duc i interessé pel scriver ite. La compilazion domana bele pec menuc, l'link l'é: <https://goo.gl/forms/jPMmwoF0DAInocJ63>

Lucia Gross



L'inaudazion del cors de auta formazion d'uton del 2017.